

Fruit Growers Victoria - Operesen blong Jeri Pika (Cherry Picker)

Nem blong mi Rowan mo mi wan projek maneja long Fruit Growers Victoria.

Taem yu stap pikimap frut, samtaem bae yu mas stanap long wan hae platfom blong kasem top blong ol tri.

Hemi impoten blong save hao blong yusum hemia mo stap sef, mo folem ol rul blong hem blong lukaotem gud yu mo ol narafala pipol.

Tedei bae yumi tokbaot sefti blong ol woka taem yu yusum wan jeri pika.

Bifo yu yusum wan jeri pika, hemi impoten blong lukaotem eni denja fastaem we i save kosem kil.

Taem yu stap wok aotsaed, hemi impoten blong ridim weta.

Difren kaen weta i save mekem i gat moa denja long ol difren woka.

Eni wok we oli mekem long hae platfom oli mas go tru long trening blong hem fastaem. Sapos yu no pas long trening fastaem, faenem wan supavaesa mo mekem sua se yu mekem trening ia bifo yu statem wok.

Mekem sua se ol wil i stap stret long graon mo hemi stap sef.

Afta yu jekem se jeri pika hemi sef blong yusum, mekem sua se hanes blong yu mo lanyad blong yu oli wok gud mo oli no kasem eni damej.

Jekem hanes mo lanyad sapos i brok, i doti, i gat mold o i gat eni narafala kaen damej long hem.

Rimemba blong fasem gud hanes blong hemi stret long yu mo blong mekem sua se hemi sef blong daonem janis blong kasem problem.

Atajem narasaed blong lanyad long wan anka poen long jeri pika blong daonem janis blong foldaon mo kasem kil.

Taem yu yusum ol kontrol blong hem, mekem sua se tufala leg blong yu oli stanap strong mo stret long medel blong basket.

Taem yu yusum jeri pika, bae yu neva stanap long eni nara samting blong kasem antap moa from bae i save mekem yu kasem kil.

Lukaot long ol samting antap long hed blong yu olsem ol denjeres waea o mesh we maet i stap antap.

Mekem sua blong kipim wan distens blong 6.4 mita aot long ol denja.

Sapos yu stap wok long jeri pika insaed long wan eria blong 3 kasem 6.4 mita, yu mas stap wetem wan spotter we hemi gat wan laesens, mo bae yu neva go insaed long 3 mita ia from hemi tabu ("no-go zone").

Taem yu leftemap platfom, no muvmuv mo neva sidaon, stanap o lin long reling.

Taem yu karem frut, mekem sua se yu no fulumap tumas basket blong yu.

Taem yu kasem inaf frut, godaon long graon mo pasem long wan narafala woka.

Neva muvum jeri pika taem yu stap antap.

Oltaem bae yu putum i godaon fastaem bifo yu muvum.

Bifo yu finis wok, i gat sam samting yu mas mekem blong mekem sua se evriwan i sef.

Jekem gud masin blong eni damej o problem we i gat afta long dei ia.

Bifo yu aot long wok saet, rimemba blong karemaot huk blong hanes mo putum long wan sef eria.

Sapos yu gat wan storej ples long saet, bae maneja blong yu i talem ples we i stap long hem.

Sapos yu karem hanes i gobak long hom, mekem sua se yu putum gud long wan sef mo drae eria.

Afta yu finis long wok, rimemba blong ripotem eni problem we yu bin fesem long dei ia mo talemaot eni denja o damej long supavaesa blong yu.

I gud tumas, yu mekem wok long jeri pika hemi sef.
